

cumvicine, che se dovesse scriver tutti li homeni da remo per l'armada sua, la qual a tempo novo intendeva armar, i qual homeni siano tutti turchi; il che è stà confirmato da molti cittadini da Corphù.

*In lettere di 15 Zener da Corphù.*

Come se confirmaveno tutte le nove soprascrite, et più che 'l se havea inteso in mar Mazor fabricarsi do galioni grossi de passa 25 per portar artellarie. *Item*, che facevano vender tutti i biscoti vechii, et facevano far de novi in loco de quelli.

141<sup>b</sup> Questa è una condanason presa ne lo Illustrissimo Consejo di X, a di 6 del presente mese de Fevver 1517, contra sier Marco Michiel qu. sier Alvise qu. sier Maphio, et absente ma legittimamente citado, sopra le scale de San Marco et Rialto, per aver ne li proximi zorni in habito de maschara proditoriamente assaltado, ferido et morto el nobil homo sier Vincentio da Molin de sier Alvise el procurator; ferido *etiam* el nobil homo sier Domenego da Molin fo de sier Marin. Che questo Marco Michiel sia perpetuamente bandito de Venetia et del distreto, et de tutte terre et luogi nostri, si da parte da terra come da parte da mar, et da tutti i navili nostri armati et disarmati, et se mai in alcun tempo el contrafarà el bando et preso sia, sia conduto qui a Venetia, et sia posto a l' hora solita sopra una piata et per el Canal grandò sia conduto a Santa †, proclamando uno comandador assiduamente la colpa de quello, et da poi sia strasinado a coda de cavallo fino al luogo del commesso delitto, dove li sia tagliada la man destra, et poi sia conduto in mezo le due Colone et li sopra uno eminente solaro sia descopado et squartado in quatro quarti da esser apicadi a le quatro forche, ne i loci consueti. Quelli veramente che lo prenderano et darano vivo ne le forze nostre, habino libre quatro mila de pizoli di beni soi, se ne serano, se non dei danari de la Signoria nostra, et *ulterius* possino trazer de bando uno bandizato de Venetia et de tute terre et luogi nostri per cadaun caso, excepti solamente i casi de rebellion et de publici assassini, et de quelli che per mal modo hanno tolto i denari de la Signoria nostra: quelli veramente che el dito Marco amazarano ne le terre et luogi nostri terrestri et maritimi, over in navili nostri armati e disarmati, habino lire tre mila de pizoli, et la facultà de trazer uno de bando *ut supra*; et *ulterius* l'interfector,

sia homo de villa sia di città, sia exempto da ogni angaria real et personal. Et se per avventura alcuno trovasse over haveasse in caxa sua il prefato Marco et non lo denunciassse immediatamente, sia perpetuamente bandizato de Venetia et dil destreto. Et da mo' tutti i beni del ditto Marco siano obligati a le taglie sopradite, et sia publicada la presente condanazion doman nel Mazor Consejo, et el zorno seguente su le scale de San Marco et de Rialto, et *similiter* ne le altre città et luogi nostri che apparerano ai capi de questo Consejo.

*Publicata fuit in Majori Consilio, die 7 Februarii 1517.*

*Publicata fuit supra scalis Santi Marci die 8 mensis predicti, et supra scalis Rivoalti.*

A di 8. La matina fo gran pioza, et fo lettere di 142 Roma, di 4, di l' Orator nostro. Prima, mandava lettere di l' orator in Spagna. Avisa le noze dil ducha Lorenzo sarà in quella di Franza, sicome l' orator dil Christianissimo re li ha ditto esser concluse, et el Ducha vol quella di Franza. *Item*, come erano zonte lettere di Alemagna de l' Imperador al signor Alberto da Carpi, suo orator, in materia cristiana: e che 'l Papa aspetava la risposta di altri principi per poter concluder etc.

*Di Spagna, da Valadolid, di sier Francesco Corner orator nostro, di 11 et 14 Zener.* Scrive prima sopra le represaie, come è materia molto fastidiosa per aver fato immunità e concession e non se pol cussi revocar, *tamen* se troverà qualche expediente: ha parlato col Gran cancellier de questo. *Item*, come el Re mandò a tuor 300 mila ducati, fo dil cardenal de Toledo, quali erano li a Toledo, et levati, parse a quelli non lassar portarli via, e li feno ritornar, dicendo per le soe constitution il Re non pol tuorli. *Tamen* l' Orator scrive el Re li averà per via dil Papa dandoli qualche summa. *Item*, come monsignor di Clevers è in gran odio de quelli grandi di Chastiglia, et si aspetava de li l' orator de Franza; et come se diceva, quel re di Franza feva zente per andar a recuperar Tornai che tien el re di Anglia, con el qual di Anglia questo re Catholico tien bona intelligentia. Scrive come recevete li sumarii de le cosse dil Turcho, et cussi come la Signoria li scrisse li comunicasse secrete, *unde*, reduti in uno camerin col re Catholico et monsignor di Clevers, li fe' lezer ditti sumari. E perchè fo ditto che la Signoria deva vituarie in Barbaria et stagni a infideli, l' Orator seuso la Signoria, dicendo non era

(1) La carta 241\* è bianca.